

四庫全書

經部

欽定四庫全書

經部

四書蒙引卷十

詳校官給事中<sub>臣</sub>戴璐

刑部郎中<sub>臣</sub>許兆椿覆勘

總校官編修<sub>臣</sub>倉聖脈

校對官中書<sub>臣</sub>葉蘭

謄錄監生<sub>臣</sub>宋九辰

欽定四庫全書

四書蒙引卷十

明 蔡清 撰

公孫丑章句上

芟二條

夫子當路於齊

臧四十二字芟末條

當路居要地也註路者人所必由也如掌刑罰之權則凡入刑罰之科者必由焉如操錢穀之柄則凡有錢穀之數者必由焉是彼當要路而我必經由其路而通塞有在於彼者故曰當路也

管仲晏子之功可復許乎

艾二條減二十三字第二條出下題

許猶期也註謂自許也自期也觀公孫丑此問尚

未敢必孟子之能為管晏而不知孟子之不屑為管

晏也以今之道德一時而觀孟子猶未甚見孟子

之高處惟自當時言之則滿天下是治功利之學者

君非此不求於下臣非此不以獻於上士非此則

全不見數於人內而父兄之所以教其子弟外而朋

友之所以相傳授付囑者無非是功利獨有孟子一



人汲汲焉皇皇焉力以堯舜之道孔子之教為說必  
欲一掃功利之蕪穢以還先王之大道此是何等用  
心何等氣力真有大功於天下萬世也故曰孟子之  
功不在禹下

子誠齊人也知管仲晏子而已矣

斐一條移一條入上題

齊人但知其國有二子不復知有聖賢之事註聖賢  
之事謂正心修德而致主於王道也即大學一部孟  
子所謂以齊王者知管仲晏子而已矣言管晏之

外更有抱格心致主之學掀天揭地之功者皆所不知也

吾先子之所畏也

臧七十八字

子路勇於義而不可以勢利拘又負大有為之才若達却為國以禮道理則是堯舜氣象結纓之節有行一不義殺一不辜而得天下不為之心所立如此曾子服之非謙辭也然曾子惟其畏子路此曾子之所以為曾子也

功烈如彼其卑也

楚三條藏一百四十五字

烈猶光也註指功烈之著見者言也謂古之聖賢間  
有功烈不至於大就者則以不得君之專任或在位  
之不久耳今管仲云云此其所以不足多夫子大  
管仲之功而曾西乃卑管仲之功烈何也大管仲之  
功者據其所就之事業言也卑管仲之功烈者本其  
心術之不正而要其所就亦終不得與於王者之徒  
也二者固各有所指曾西之卑其功烈即夫子之小

其器也夫子之大其功是恐人盡遺其長故特揭而  
張之惡而知其美之意也 譬之御者子路則範我  
馳驅而不獲者也管仲之功詭遇而獲禽耳註範我  
馳驅比子路聖門規矩作為也不獲比子路僅可治  
千乘之賦而九合一匡之功業有所不逮也以詭遇  
比管仲之行伯術以獲禽比管仲之九合一匡之功  
業也

爾何曾比子於是

首條藏七十八字

曾之言則也乃也謂之言者蓋曾之一字即言也此  
與七言五言之言同謂曾之所以為曾者則也但曾  
字與則未必全同故又銜着箇之言二字而不曰則  
也謂何乃比予於是也 上云爾何曾比予於管仲  
下云爾何曾比予於是承得君專任政久而功烈  
卑言也謂爾何乃比我於此等之得君專行政久而  
功烈卑者邪

而予為我願之乎

此與可復許乎一從孟子說故許為自許一從丑說  
故願為相願 或人初擬曾西於子路因其不敢當  
乃始以管仲擬之然則或人之權衡殆亦審矣第猶  
未知曾西耳 此人見識優於公孫丑若公孫丑必  
不以子路為優於管仲 丑並論管晏孟子只及管  
仲而不及晏者以或問曾西只及管仲云云故只承  
之曰管仲曾西之所不為也而子為我願之乎初非  
以晏子之事功不及管仲且未嘗當齊又以其人稍

正而無可譏也新安陳氏之說皆非

管仲以其君霸云云

夫管仲以其君霸有可言者矣晏子以其君顯處何如曰當晏子時五霸俱沒中夏諸侯惟齊最强大景公在位且五十八年諸侯莫侵侮之者其任晏子或用其省耕省斂之言而興發或用屨賤踊貴之言而寬刑或增其室或更其宅此皆賢君所為如夾谷之會能歸侵疆亦庶幾知強仁義者在當時宜其視他

諸侯為獨顯也蓋亦所謂彼善於此者與其晚年失政使陳氏得厚施於國又多內嬖而不立太子則自其失矣

以齊王由反手也

臧二十四字

此是孟子自負也以言能佐輔之也以字正承上文以其君霸顯二以字說來皆謂能致其君也一說只言以齊之時勢而王猶反手非也如此則只是說齊勢之所致而非說孟子之所致也便如何答得管



仲晏子猶不足為之問與不為管仲之意其下文雖  
一說齊之事勢易德行速而不及孟子致君之事然  
行仁政以解倒懸非孟子佐之而誰克舉此  
若是則弟子之惑滋甚

言以管晏為不足為弟子既已惑矣今又言以齊王  
猶反手則惑轉甚也

且以文王之德

德蓋指治岐之政九一世祿不征不斂之類下文德

行速亦指仁政也且與未洽及大行字意相符不只就文王一身上說

百年而後崩

不可謂在位百年也在位無百年只言其壽之長以見其在位之久也

然後大行

戒六十三字首條湊合

兼武王周公說在武王為政化大行在周公為教化大行集註曰教化大行者承制禮作樂言也孟子只

言大行古文也 武王只是克商以有天下如何亦  
說大行曰沛然德教溢乎四海無遠弗届非前日青  
兗及冀又非有周政化所及之日比也

今言王若易然

條末四字舊誤在此今歸下題

一說承上齊王反手言齊王之易若此也一說謂似  
無難然者據下文今時則易然則當從無難然之說  
不必拘拘於猶反手之說

文王何可當也

戒三十九字條首四字舊誤在上

當猶敵也以其德不可當也孰謂文王不足法哉但文王所遭之時勢難耳由湯至於武丁至故久而後失之也此言其時之難尺地莫非其有至是以難也是言勢之難

是以難也

本題宜次久而後失之題下

由湯至於武丁賢聖之君六七作

戒十一字

湯太甲於桐處仁遷義既復辟而保惠庶民不敢侮鰥寡太甲五世至太戊修德而祥桑死商道復

興太戊三世至 祖乙以河決之害去亳遷耿祖乙  
六世至 盤庚又以河決之害遷於亳行湯之政商  
道復興盤庚三世至 武丁得良弼戒雉雠伐鬼方  
商中興焉又八世而為紂凡一百單八年云 賢聖  
之君六七作則其教化之陶習民俗者厚惠澤之固  
結民心者深故繼之曰天下歸殷久矣久則難變也  
武丁朝諸侯有天下猶運之掌也

蓋商自盤庚之後小辛小乙二王繼立商道又衰諸

侯多不來朝矣天下多非其有矣而武丁能用  
人修政於是諸侯無敢不來庭者商道遂赫  
然中興故曰武丁朝諸侯有天下猶運之掌也  
言其中興之盛也惟有鬼方負遠不服於是  
有三年之師亦可想見其中興之盛

其故家遺俗流風善政

故家舊臣家也遺俗舊民俗也此在下者  
流風以修身齊家之化言善政以紀綱法度  
言此全是在上

者曰故曰遺曰流皆自商之先王身上來也

微子 微仲 王子比干 箕子 膠鬲

作五箇人看微子名啟故知微仲又是一人

故久而後失之也

補題二句其下二條出前是以難也題下

失之於武王時言不在文王手頭失也 文王猶方

百里起

補

問周自太王之時商道寢衰而周日強大

矣何文王猶方百里起也邪曰是時太王王季雖盛

商運雖衰微然王制猶未改故只是仍舊百里之國

太王王季又非挾君無已而併吞鄰國以自封殖者  
其所謂强大者只是國勢內實而有可畏不易敵之  
勢耳文王由方百里之言固自無可疑 是以難也  
補此句只帶然而文王猶方百里起不兼承上文上  
文自有故久而後失之一句在了

齊人有言曰

芟三條戒十四字

雖有智慧不如乘勢以作事言雖有鎡基不如待時  
以種田言蓋以待時譬乘勢也此待時與下文時之



易又不同今時則易然也此時又該時勢 正韻注

鉉鉏之別名孟子之基字蓋從簡也

夏后殷周之盛地未有過千里者也

三代盛時王畿不過千里註盛字重看言其盛時王  
畿猶不過於千里則齊之千里之地所以為廣也夏  
后殷周之時普天皆王土率土皆王臣之日也

雞鳴狗吠相聞而達乎四境

移一條入下題

人之所居必有雞犬故云則是人煙接連無間斷處

也不既庶矣哉

地不改辟矣

臧二十字末條出上題

言地已辟而不待再辟矣凡改者皆是更圖之辭如  
改卜改筮改日之類 行仁政而王莫之能禦也言  
以此勢行仁而王易也與下條飢者易為食渴者易  
為飲相對 此言其勢之易也註易是甚事易謂齊  
王易也故此條曰行仁政而王莫之能禦下云飢者  
易為食渴者易為飲以比民心之易得或者只以地

辟民聚為勢易而以行仁政而王為勢易之外句誤  
矣

飢者易為食渴者易為飲

以況憔悴之民易為德也此之飢渴猶下文之倒懸  
也皆是喻 問勢易時易如何分曰勢易以齊力量  
而言時易以天下機會而言有其時而無其勢固不  
足以致王滕文公是也有其勢而無其時亦不可以  
致王太王王季雖周日强大然商命未絕至文王亦

只三分有二是也

孔子曰德之流行速於置郵而傳命

芟四條

孔子此言不必在時勢易上來蓋德之感人自是速也孟子引此亦未必拘在時勢易上不必言時勢既易則德行自速蓋自為一條上文雖云行仁政而王莫之能禦也飢者易為食渴者易為飲然其實只據見成時勢道雖兼德化意不曾兼德化對說至此方說出德行之速而下文方總之曰當今之時萬乘之

國行仁政民之悅之猶解倒懸也至此所謂行仁政  
民之悅之猶解倒懸方實說出由時勢易而德行速  
意若上文行仁政而王者猶是輕帶說 若以德之  
流行就帶上文時勢易說則下文所云當今之時萬  
乘之國行仁政民之悅之猶解倒懸者不必用矣故  
須各自為一項說而下方總云云 德行須不過於  
置郵之傳遞而乃以為更速何也曰此亦甚言其速  
耳如云捷於影響豈真有捷過影響之理 置驛也

郵駟也

註

即今之鋪亭字書曰馬遞曰置步遞曰郵

大抵置長而郵短故置用馬遞而郵用步遞也

當今之時萬乘之國云云

題下藏六十八字

當今之時時易也萬乘之國勢易也行仁政民之悅之猶解倒懸德行速意也此處方帶連德行速然亦不是時勢易故德行速也只是此節意重在德行速耳惟此時為然補時兼時勢時勢易則德行之速者愈速矣故連德行速說在內

公孫丑問曰夫子加齊之卿相芟一條藏十三字

此一節當分五節看東陽許氏之說 一自夫子加齊之卿相至又不如曾子之守約也大槩言孟子能不動心未詳其所以能不動心處只畧露其端 一自敢問夫子之不動心至是氣也而反動其心則言孟子之不動心異於告子者且從養氣一邊說 一自敢問夫子惡乎長至聖人復起必從吾言矣乃詳孟子之心所以不動處兼知言養氣二者言也 一

自宰我子貢善為說辭至乃所願則學孔子也則皆是願學孔子之意以言外味之又見得孟子雖不敢自以為聖然知言養氣學已到聖處蓋已寓繼孔子之意矣 一自伯夷伊尹於孔子至未有盛於孔子也則皆盛言孔子之聖卓冠於百王以見孟子之所願學者也

雖由此霸王不異矣

斐五條

此指得位行道 謂居卿相之位而期王霸之業任



大責重如此無不動心否蓋且見孟子謂以齊王猶反手而未能以遽信也故有此問 任大責重亦有分別如為泉州府知府則此一府之事皆其職任也若府事之治不治民之安不安則皆其責也 公孫丑以管仲晏子期孟子既為孟子所斥於此又渾舉伯王為言則見當時功利入人之深而且之識見如此七篇之書仁義道德之微旨決非其所能述也亦有所恐懼疑惑而動其心乎註饒氏曰要之不疑

惑然後能不恐懼集註論心之動則以恐懼居先論  
心之所以不動則又以無所疑惑居先我知言我善  
養吾浩然之氣一條註先云於天下之事無所疑後  
云於天下之事無所懼是論心之所以不動也 君  
子道明德立之時註理在事物為道故曰明屬無所  
疑理得於己為德故曰立屬無所懼

若是則夫子過孟賁遠矣

斐一條

謂其勇於擔當也 且蓋借之以贊孟子不動心之

難註朱子下一借字蓋孟賁以力孟子以心丑非全  
不曉而以孟子之不動心為孟賁類也故曰借而丑  
亦自言過孟賁遠矣若全以為一類亦不得為過之  
遠 孟賁勇士註齊人力能生拔牛角秦武王好多  
力士賁往歸之

是不難告子先我不動心

告子名不害不知何所出如孟施舍北宮黝亦皆不  
知其出處故曰黝蓋刺客之流舍蓋力戰之士

視刺萬乘之君若刺褐夫楚三條減一百三十七字

無嚴諸侯謂無可畏憚之諸侯非謂無足畏憚之諸侯也只是說天下諸侯不見有可畏者甚言其勇而已若說惟無足畏憚之諸侯惡聲至乃敢反之非孟子立言之本意也 褐毛布寬博寬大之衣賤者之服也補褐寬博是兩般不是褐衣寬大也以註有之衣二字 褐為賤服猶可寬大之衣如何為賤者之服蓋以其貼身衣少又不以時澣濯整摺自然虛軟

而寬博也

視不勝猶勝也

芟一條

言我雖戰不勝自視猶勝也何也彼量敵而後進慮勝而後會便是無勇而畏三軍者也則雖勝而未免於懼猶不勝矣舍豈能為必勝哉但能不懼耳其與北宮黜俱是不畏死而已皆有勇無謀之士量敵而後進或進而攻之或進而拒之不專進戰也慮勝而後會則專指戰焉

舍豈能為必勝哉能無懼而已矣

此舍自言不是孟子言註云舍蓋力戰之士以無懼  
為主此言在本文之外 究竟能無懼亦歸於必勝  
孟子立言之法由粗漸入精耳 舍黜二節皆以明  
不動心之有道所謂心有主者也但精粗得失不同  
耳告子亦是有主者

孟施舍似曾子北宮黜似子夏

斐四條戒一百十七字

饒氏曰孟施舍取必於己其氣象如曾子之反求諸

已北宮黜取必於人其氣象如子夏之篤信聖人此說最好取必二字尤妙

昔者曾子謂子襄曰子好勇乎吾嘗聞大勇於夫子矣便見得子襄所好亦是小勇故曾子

云

子襄曾

子弟子也竟不知何姓亦以其言知之 自反而不縮雖褐寬博吾不惴焉者非怕褐寬博也怕理也自反而縮雖千萬人吾往者非輕視千萬人也恃吾理之勝不見千萬人之為衆也 自反而不縮雖褐寬

博吾不惴焉要以起下段之自反而縮蓋浩然之勇以無懼為主為褐寬博者所惴終是理不直而有所懼也 吾不惴焉猶云吾得不怕他不受於褐寬博者不知此義也能無懼而已矣者亦不知此義也正可以相形觀 吾不惴焉焉猶乎也大註惴恐懼也今人或謂是恐嚇他非也 惴恐懼之也往往而敵之也二之字同 褐為賤服猶可寬大之衣如何為賤者之服蓋以其貼身衣少又不以時澣濯整摺自



然虛軟而寬博也 褐寬博是兩般不是褐衣寬大  
也以註有之衣二字

孟施舍之守氣又不如曾子之守約

孟子之不動心其原蓋出於此下文詳之蓋謂孟子  
之不動心在集義以養浩然之氣而孔子此言正以  
直養氣之說也是孟子得之於曾子曾子得之於孔  
子者也故曰其原蓋出於此然孟子之不動心寔兼  
知言養氣而養氣中許多節目皆未及也故又曰下

文詳之此詳字與下文又詳告之以其故者同饒氏  
之說少異 孟子之不動心其原蓋出於此承上句  
反身循理說

敢問夫子之不動心與告子之不動心可得聞與  
此承孟子我四十不動心及告子先我不動心之言  
而問也丑問雖兩平孟子只述告子之不動心者而  
論斷之亦就見得已之所以不動心者也

不得於言勿求於心

芟二條第二條出下題

於言有所不達註言自己之言也言之所以不達其  
病本出於心今乃不求其理於心蓋以若求其理於  
心則心為之撓亂矣告子只要制得心定以論性數  
章觀之可見 愚始以不得於言之言為告子自己  
言後以知言一節集註云彼告子不得於言而不肯  
求於心則又以為他人之言為疑今觀雲峰胡氏註  
云或疑兩言字不同告子不得於言己之言也孟子  
知言天下之言也應之曰理一而已告子於己之言

且不能反求其理如何能於天下之言而求其理孟子於天下之言能究極其理則於己之言可知也以此證之則告子不得於言為己之言益信而與孟子知言者相反亦自不相妨矣理雖一而界限却要分明且知言節註云至為義外之說則自不免於四者之病其何以知天下之言而無所疑哉益見其為自己之言無疑矣

不得於心勿求於氣

芟四條減一百六十四字

不得於心而不求助於氣者如何曰如一事之失心  
所不安也則力制其心既往不咎不復用力追改前  
事之失彼以為用力追改則心為之動矣只是勁把  
心制住豈是自然能不動 不得於心亦須求於氣  
如有客來訪我却不禮待他此是心不安處則當追  
而謝之如學者理有不明是不得於心也則當覽觀  
乎經史質問於師友以求其明此皆目視耳聽手持  
足行之事便是求助於氣處要之心與氣未始不相

通也 告子不得於言勿求於心者直恐動其心也  
不得於心勿求於氣又恐氣反動其心也此所以固  
守其心而不動之速也如此不動心是誠亦不難  
愚謂告子實未嘗不動心何以言之不得於言不得  
於心便是動心了也故曰冥然無覺悍然不顧而已  
然其心終有必不安者不動心豈有兩種道理邪如  
北宮黝孟施舍各有所主而暫能不動然主非其主  
恐皆不免於靜中之動嗚呼微矣孟子豈不知哉對

公孫丑氏子云云耳 不得於言勿求於心之所以  
不可者誠以言之病不病正出於心也然則其勿求  
於心之不可也斷矣 不得於心勿求於氣所以為  
可者蓋心為氣主本非氣所能助今心既違理而不  
安矣求助於氣何益此所以為急於本而緩其末其  
實亦不是能急於本但以所緩者末為急於本耳然  
學問之道苟心不安亦可求助於氣本末亦不可相  
無但要從根本上正起故曰持其志無暴其氣謂之

僅可則有不可在矣 不得於心勿求於氣如何為  
急於本而緩其末曰心者氣之主也力制其心而不  
為氣所動是亦知心之為重也此只求力制其心上  
說急於本若正論急於本則須是持其志方是此特  
據告子而取其彼善於此者耳

夫志氣之帥也 芟一條裁四十字更定次序

如目視而耳聽手持而足行等皆一氣之寓也一惟  
心所役運非志為氣之帥乎目之視人但知其為目



之視而不知其所以視者心實使之也耳之聽人但知其為耳之聽而不知其所以聽者心實使之也云云 輔氏曰不言心而言志者心之動而有所之處也但志則就其動處言故尤切耳下文又言是氣也而反動其心亦可見矣 氣體之充也氣自是氣體自是體自手至足都是體氣則行乎體之中體無氣則餒而不能運動矣故曰氣體之充也 氣貫乎一身之間而主於一心上既曰志氣之帥則氣非志之

卒徒而何所以朱子直出卒徒字亦本呂氏克己銘

夫志至焉氣次焉

芟一條移一條入下題

至字與次字對猶云第一件也

無暴其氣

芟五條畧更次序

愚謂氣固氣也無暴其氣則亦有志在焉下文善養浩然之氣自有持志在故雲峰云養氣之功在集義而所以集義者在敬以持志此無暴字兼直養而無害夫志氣之帥也至無暴其氣全是破他不得

於心勿求於氣之說以見內外本末交相培養而不  
可只力制其心而不求助於氣也其不得於言勿求  
於心一句已斷以為不可了故不復論然此處雖不  
多斥破他至下文詳知言處自是不破之破矣 註  
急於本心而緩其末氣失於外言而遂遺其內心內  
心外氣本心末氣交相培養 兩本末字皆同兩內  
外字則惟內同而外不同失於外之外指言內外交  
相培養之外指氣 致養其氣 註潛室陳氏曰必言

致者見養氣之難須以集義為本又無正忘助長之弊方為能致養也故曰是集義所生者非義襲而取之也行有不慊於心則餒矣可見要致養不是易事此則孟子之心所以未嘗必其不動而自然不動之大畧也此處孟子未嘗正言己之心所以不動處只是即告子之言而以己意論斷之然亦可以槩見其所以異於告子者矣至丑問夫子惡乎長然後正告之曰云云是詳告之以其故也持志養氣正孟

子之所以不動心者而乃只曰不動心之大畧何也  
蓋其所以不動心還有兩端一端是知言今此所云  
只是養氣一端故下條註云孟子又詳告之以其故  
也詳畧相對況此亦但云云而已矣至於至大至剛  
配義與道是集義所生非義襲而取有事勿正勿忘  
勿助許多曲折俱未之及又非只是大畧而何 問  
持志與無暴其氣孰重曰論理持其志為重論孟子  
此節之意則無暴其氣為重蓋自夫志氣之帥也至

無暴其氣俱是以破告子勿求於氣之說言云云豈  
可以勿求於氣下節志壹則動氣氣壹則動志亦重  
在氣一邊

既曰志至焉氣次焉又曰持其志無暴其氣者何也

孟子言氣次焉次者即次之謂也此處即字不必提

依丑之問意則是認次字為後字義矣差之毫釐謬  
以千里故義理之微須至繭絲牛毛處

志壹則動氣氣壹則動志

戒十九字

志壹動氣則志固不可不持氣壹動志則氣亦不可  
以暴彼告子乃不得於心勿求於氣抑何其不知此  
義邪 志壹則動氣氣壹則動志兼善惡說不可專  
就惡邊說

今夫蹶者趨者是氣也

斐五條減一百二十字更定次序

氣動志不止於蹶趨凡視聽言動氣用事到勝處皆  
能動志所以說致養其氣自蹶趨而言則當是謹慎  
步履之間不使至於蹶趨是為不暴其氣也 今夫

蹶者趨者是氣也此氣之不出於志者也若持志工夫到則亦不至有蹶躓及妄奔趨 氣壹則動志人多要主不好者言蓋以蹶者趨者之反動其心為證是未然也孟子舉其易見者以曉公孫丑云耳且如聖人之論恕曰己所不欲勿施於人此只是從不好邊說然要之己所欲者則以施於人亦此理也又如下文知言只說諛辭知其所蔽等都是自不好者一邊說然言之病者既知其所以然則言之不病者亦



知其所以然必矣豈可謂恕只是推不好者於人知  
言只是知那不好者之言哉近時學者讀書論理此  
等執泥不可不說破

敢問夫子惡乎長

楚六條減五十一字

上文孟子總是言告子之不動心出於強制我則異  
於是於是丑問孟子不動心不待強制而自然不動  
者是果何所長而能然孟子乃言我知言我善養吾  
浩然之氣蓋惟知言則於天下之理無所疑養氣則

於天下之事無所懼此其所以不待強制其心而自然能不動者也 我知言此是盡心知性時事 我善養吾浩然之氣即存心養性所成就也 孟子曰我知言告子曰不得於言此乃易大傳繫辭焉以盡其言之言也合天下言者也言字就粘帶事物故曰知言者盡心知性於凡天下之言無不有以究極其理而識其是非得失之所以然也理者事物之理也惟於理有所不達故其言有所不究知也 知言知

也養氣行也知言浩然舉成功言其用功則在精義  
集義上 孟子一生受用只是精義集義二者精義  
故能知言集義故能養氣精義者大學所謂格致論  
語所謂博文孟子所謂盡心知性堯舜所謂惟精者  
也集義者大學所謂誠意正心修身論語所謂約禮  
孟子所謂存心養性堯舜所謂惟一者由此而往則  
為齊家治國平天下矣

我善養吾浩然之氣

芟七條移二條入上題畧改次序

謂之浩然之氣則是氣本浩然也善養者亦順而不  
害之謂耳非謂必善養然後浩然也 養氣者必有  
事而勿正心勿忘勿助長也事皆合義自反常直而  
此氣自然發生於中者也或失養或助長皆非善養  
也 浩然盛大流行之貌輔氏云盛大謂氣之本體  
流行謂氣之大用愚亦謂盛大盖所謂至大之意流  
行盖所謂至剛之意輔氏於至大至剛下註亦云  
氣即所謂體之充者然則謂氣體之充也為浩然之

氣可乎曰且未可也何也彼只承告子勿求於氣之  
氣說來未正名其為浩然之氣也況此於浩然之氣  
亦析而釋之曰浩然盛大流行之貌氣即所謂體之  
充者蓋恐人以浩然之氣為非體之充之氣故如此  
解耳其實體之充之氣本自浩然也 告子之學與  
此正相反 註孟子知言而告子曰不得於言勿求於  
心則亦冥然無覺而已孟子善養浩然之氣而告子  
曰不得於心勿求於氣則亦悍然不顧而已 問他

書不說養氣只孟子言之何故朱子曰這源流便在  
那箇心廣體胖內省不疚夫何憂何懼處來

曰難言也

非終不言也言不得也

其為氣也至大至剛

芟四條第二條出下題更定次序

此一節正言浩然之氣是這般樣子氣之體段也直  
養無害輕說下塞乎天地之間即是至大至剛但必  
直養無害方全得此氣之體段耳故云本體不虧而

充塞無間 至大至剛即是浩然以直養而無害則  
塞於天地之間即是復於浩然者矣浩然字本都該  
了因且問何謂浩然之氣故又為之狀其體段如此  
至大至剛只是說無事不做得但理所當盡者皆  
能為之此便是塞於天地之間 至大初無限量盛  
大也至剛不可屈撓流行也其體段本如是也輔氏  
以為舉體以兼用者非也體段猶云形象模樣耳非  
體用之體

以直養而無害

楚四條移一條入上題

本文曰以直養而註曰惟其自反而縮則得其所養  
猶文言曰敬以直內義以方外而程傳曰敬立而內  
自直義形而外自方皆是先儒剖析精微處蓋養氣  
工夫只在直上不在養上故曰必有事焉而勿正心  
勿忘勿助長也 其為氣也至大云天地之間此所  
本論氣之本體若非直養無害則所謂本體者不可  
見矣故併言之



其為氣也配義與道

楚四條減六十九字

義者人心之裁制道者天理之自然註朱子曰道義  
別而言之則道是物我公共自然之理即所謂天理  
之自然義則吾心之能裁制者所用以處此理也即  
所謂人心之裁制道者天理之自然猶云在物為  
理也義者人心之裁制猶云處物為義也合而有  
助之意註雲峰曰所謂合即延平所謂一滾出來之  
意所謂助即延平所謂襯貼之意皆誤認延平之旨

矣蓋延平所謂襯貼者實兼合而有助二意但凡物之襯貼者皆必是有合延平又恐人為氣與道義相配是兩物故曰一滾出來以見理氣之相依渾合而無間也 不是以直養而無害塞乎天地之間之後方能配義與道此本是一時事 配義與道正是說他不動心處上節直養無害正是說他善養浩然之氣處蓋善養浩然之氣則自然不動心故集註曰養氣則有以配乎道義而於天下之事無所懼也然其

實不是今日善養浩然之氣明日方能不動心 亦  
有理直而氣不能配之者今有兄弟兩人同是一項  
事同為人所誣其一氣弱者只是此理而發不透徹  
只伸說得三五分其一有氣者亦只是此理發便十  
分透徹自是能動人之聽則氣之合乎道義而有助  
亦可見其大意矣

無是餒也 斐五條戒四十七字

氣是人之所以充滿於身者也蓋無此氣則無以充

其體而餒矣餒則道義無所配而不免於疑懼矣安  
能不動心 餒字對充字無是謂無此氣也餒體不  
充也大註云若無此氣則其一時所為雖未必不出  
於道義然其體有不充則亦不免於疑懼而不足以  
有為矣疑懼而不足以有為貼在餒字下 其為氣  
也配義與道正言氣之功用也無是餒也特反言以  
明之耳非並舉之詞也 言人能養成此氣註以直  
養而無害則塞於天地之間此正所謂養成也

是集義所生者非義襲而取之也

同一義也謂之集義則是事事皆合義謂之義襲則只是一二事合義而已蓋養氣者只要在意上做工夫不要於氣上着力所謂必有事焉而勿正心勿忘勿助長者正以此 朱子曰是字與非字對襲字與生字對其意蓋曰此氣乃集義而自生於中非行義而襲取之於外云爾又曰生是自裏面生去取是自外面取來 雲峰曰集義只是以直養義襲而取即

是有所作為以害之然則所謂直養而無害者正該  
必有事焉而勿正心勿忘勿助長也 據理而言則  
有義有道據盡此理而言則只是集義 是集義所  
生不兼言道饒氏曰道體義用體上無做工夫處故  
只說集義為是也但其上云浩然之氣其體配道其  
用配義此說似戾蓋配義與道皆是就行處說故曰  
使其行之勇決無所疑憚也饒氏又云無是餒也是  
無氣則道義餒行有不慊於心則餒是無道義則氣

餒此說尤謬二餒字本同也皆謂體不充言氣雖  
可以配道義而其養之之始云云此始字正對上條  
註養成此氣之成字蓋氣之始養也則氣實資理以  
生而氣之養成也則理又資氣以行論集義所生  
則義為主論配義與道則氣為主或說行有不慊  
於心則餒是帶下句告子未嘗知義以其外之也說  
非是蓋上文是集義所生非義襲而取內就有箇心  
在故註云自反常直是以無所愧怍無所愧怍即慊

於心也非義襲而取之則正與集義所生相反說而行有不慊於心則餒正所以發其意也此三句皆見得義內處註云然則義豈在外哉亦通管上三句詞雖不管意亦自管到

我故曰告子未嘗知義以其外之也

斐三條

是集義所生者非義襲而取之也行有不慊於心則餒矣如何見得義之在內蓋心之慊否一係於義之得失此見義之屬於心處而告子以義為外則必不



能集義以求慊於心而是浩然之氣無自生矣 告  
子未嘗知義以其外之也不可謂指不得於言勿求  
於心說大註只是因舉以證之耳故曰即外義之意  
又曰詳見告子上篇 外義故不能集義何也以其  
不知其為吾性所固有而不復以為事也 上文不  
得於言勿求於心即外義之意註蓋不得於言言中  
自有義也註云不求其理於心義即理也其理即言  
中之義也 如何不得於義便心不慊豈非以義與

心根脉相連邪蓋仁義禮智信是心內物也此義字又該仁義禮智信單言者也

必有事焉而勿正

芟十一條藏四十二字

言養氣者但當以集義為事而勿預期其效久之當自然有效設或久之不見效則恐是集義之功猶有所未至故但當勿忘其所有事只管益集其義切不可作為以助其長也助長之害視之忘其有事者尤甚也 忘與助長皆生於正之不得 正忘助長三

病亦相因而至盖有忘而不助者助則無不忘矣  
但能集義到底正忘助三病俱無有是病者則先正  
而後或忘或助無則一發俱無無復先後之可言者  
豈有先勿正然後勿忘又然後勿助長之理 此數  
句總是說要集義到底是集義所生這一句裏面也  
有不正也有不忘也有不助長才得他生生字與取  
字正反對生是自然來底取是計較得來底 所以  
戒之必有事焉而勿正心勿忘勿助長者正以其是

集義所生者非義襲而取之也若有事未幾而正之  
或忘或助則是皆欲以義襲而取之者也 必有事  
焉雲峰分念念合義與事事合義不是只當以事言  
念則隨之參之前後大註皆然 註養氣者但當以  
集義為事而勿預期其效其或未充則但當勿忘其  
所有事而不可作為以助其長味註意則勿忘勿助  
長詞雖兩平意則歸重下句也 集義養氣節度註  
節度猶言法則也不是節次度數 養氣工夫以一

言該之曰集義以二言該之曰直養而無害以四言該之曰必有事焉而勿正心勿忘勿助長也其實一而已有事固是集義勿正勿忘勿助長要皆不出一集字之外也蓋養氣工夫只當在義上着力不消於氣上着力也氣上着力便是助長矣

宋人有閔其苗之不長而揠之者

戒一百十一字

此段近似莊子其事之有無不可知然謂之宋人何也只說勿助長也可矣而必以宋人揠苗為言者

顯其害也

天下之不助苗長者寡矣

變三條減六字

言天下之養氣不似那宋人之助苗長者寡矣彼以  
為氣無益而舍之不養者猶似不耘苗者耳未為害  
也至於助氣之長者正如揠苗者也則非徒無益於  
氣而又反害於氣矣重在助長之害不可以無益而  
舍之者對看不可以集註無是二者云云為正解本  
文

非徒無益而又害之

艾三條藏三十四字

或疑註謂然不耘則失養而已。握則反以害之為專說。苗以證本文非徒無益而又害之亦只是說苗不然也。天下之不助苗長者寡矣。豈天下治苗者皆助長乎。亦借說耳。此二句註亦是借說養氣者。故下即承之曰。無是二者則氣得其養而無所害矣。孟子曰。以為無益而舍之者不耘苗者也。助之長者握苗者也。先氣而後苗直說也。集註曰。舍之而不耘者忘

其所有事樞而助之長者正之不得而妄有所作為者也先苗而後氣倒懸也一理也互相發也是集義所生者至非徒無益而又害之大抵語意都從敢問夫子惡乎長上說來故往往碍着告子集義所生一條本文則曰告子未嘗知義以其外之也而註云則必不能集義以生浩然之氣矣

何謂知言

據孟子所言非知言乃知心也不知其心不足為知



言因言以知心心總是言之源頭也故曰諛辭知其  
所蔽淫辭知其所陷重在知其蔽陷離窮上

諛辭知其所蔽

斐六條一圖減三十八字末條倒用二字

即其辭之所諛若此則知其心之所蔽者有在淫邪  
遁皆然要看四箇所字諛淫邪遁蔽陷離窮皆是大  
綱字其實諛有許多樣諛蔽亦有許多樣蔽 諛辭  
知其所蔽等內各有節目蓋從大綱說只是諛與蔽  
而其中却有或蔽於氣質或蔽於物欲或學術之蔽

或習俗之蔽然就氣質之蔽亦有許多端彼楊氏蔽於為我墨氏蔽於兼愛告子蔽於強制之類其言亦因類而分只此四病所該甚廣 誠者心蔽而言亦蔽也淫者心陷而言亦陷也邪者心離而言亦離也遁者心窮而言亦窮也但在言謂之誠淫邪遁在心謂之蔽陷離窮各以類耳理則一也 此四者有則俱有未有誠而不淫邪且遁者如意必固我一般起於意遂於必流於固而成於我亦皆以類相因而至

也 朱子曰心有所蔽只見一邊不見一邊如楊氏  
為我墨氏兼愛各只見一邊故其辭詖詖是偏陂此  
理本是平正他只說得一邊 其心明乎正理而無  
蔽註四病起於蔽也既有蔽則陷與離窮相因而見  
矣 知言獨就詖淫邪遁不好邊說者亦是從告子  
說來大槩自此以上節節都是與告子反者

生於其心害於其政

芟四條戒二百二十四字

謂蔽陷離窮之失既生於心不但發於言者有詖淫

邪遁之病而已必且害於政而所設施之間大綱皆不是了大綱既不是則本根壞而枝葉隨於是衆目皆差了政事亦不必十分分先後故註云又知其害於政事之決然不得似生心害政之先後矣或生於心而害於政或生於心而害於事本無先後害則一時俱害此亦立言一時之不同耳 此政字不是有位者之政有位無位皆有政也只是大綱所在政之與事猶有子言小事大事一般 或問何謂知言章

先說害於其政好辯章先說害於其事曰此亦無說  
必求其說則鑿矣蓋告子與楊墨等是邪說等是詖  
淫邪遁也非楊墨之害先事而後政告子之害先政  
而後事也然究其至當歸一之說則又似先政而後  
事者為正蓋大綱是大本所在大本既受病則其餘  
枝節可知故先害政而後害事之說為長 生之端  
微發之迹著試云發於其心生於其政則便不通好  
辯章曰作於其心作起也其端亦微 心之病一路

發於言一路發於政事言病則政事亦病孟子知言之極所以知其蔽陷離窮之害於政事者何以知之亦不過是因辭之詖淫邪遁而知其心之蔽陷離窮即就此而併知其蔽陷離窮之害於政事之必然耳豈不亦是知言之事乎

聖人復起必從吾言矣

斐四條減二百四十六字更定次序

此句只帶生於其心四句不連帶上四知說大註云又知其害於政事之決然而不可易聖人復起必

從吾言矣所以明其為理之必然也非固自矜其言之必信也故曰孟子知言之極其心明乎正理而無蔽然後其言平正通達而無病註明字與蔽字相對無蔽則亦無陷離窮矣平正對偏陂而言正則不偏平則不陂通達則不窮而遁矣言有詖淫邪遁之四病反之者獨言平正通達何也曰平正原其始通達要其終而淫邪之反者在其中矣心通於道而無疑於天下之理註道以理之本體言理以道之散

殊者言 孟子知言正如人在堂上方能辨堂下人  
曲直若猶未免雜於堂下衆人之中則不能辨決矣  
註謂之人在堂上以其有超於堂下之人也謂之未  
免雜於堂下衆人之中以其見識只在衆人之列也  
問人在堂上如何便能辨堂下人曲直嘗見有巍  
然堂上召一案數十人而鞠之或連數日不得其事  
情而數十人之中有退而捩腕唾鄙其不明者則堂  
上之人豈必皆能辨堂下人曲直而雜於堂下衆人



之中者皆不能辨乎抑以勢位言乎非也吾嘗觀此而有感矣古者六德為諸侯三德為大夫其下凡有一才一善者位皆稱之所謂自公卿而下位各稱其德終身居之得其分者所謂小德役大德小賢役大賢也其在堂上者必其才其德宜在堂上其在堂下者亦必其才其德不得在堂上之人程子此言理之正而常者也古者天子之射其步遠於諸侯諸侯之的又遠於大夫蓋其力量亦須過人然後能服人

也

宰我子貢善為說辭

大槩只是善辯

冉牛閔子顏淵善言德行

焚二條減十四字

善言字輕德行字重 善為說辭則是有言者不必

有德善言德行者不期於有言也有德者必有言也

問冉牛閔子顏淵善言德行是亦兼言語德行而

有之乎曰丑之學識粗淺蓋以為只是善言德行而

已不能善說辭也以此當孟子之善養氣若以理言則實是兼言語德行然公孫丑之見不及此也

孔子兼之曰我於辭命則不能也然則夫子既聖矣乎  
芟一條減二十字

語意亦明說孟子勇於自任 我於辭命此命字是為命裨諲草創之命

聖則吾不能我學不厭而教不倦也

減四十八字末條湊合

饒氏謂學聖人之道不厭以聖人之道教人不倦今

據論語註為之謂為仁聖之道誨人亦謂以此教人則可從饒說 或曰論語一章或正是答子貢之問而公西華應之記者詳畧不同耳 學不厭者求以自明故曰智也教不倦者推己及物故曰仁也仁且智夫子既聖矣夫孔子實既聖而猶不敢當爾遽以我為既聖惡是何言 愚每讀此一段以為孟子既是不敢當既聖則只宜引到聖則吾不能或到我學不厭而教不倦也亦可今乃又引子貢曰學不厭智

也教不倦仁也仁且智夫子既聖矣何也明孔子雖既聖而猶不自聖以見已之尤不敢當也

夫聖孔子不居是何言也

一段其實是自任而固為謙拒殊不可曉況下文又明言願學孔子雖顏子亦所不安則非自任以既聖而何但不顯然自承耳清每疑此一節

子夏子游子張皆有聖人之一體

斐二條減五十三字

朱子曰聖人道大而能博如游夏得其文學子張得

其威儀皆一體也惟冉牛閔子顏淵氣質不偏義理  
完具獨能俱有聖人之全體也但未若聖人之大而  
化之無限量之可言故以為具體而微耳 具體而  
微謂有其全體此體字是身體之體故曰一體謂一  
肢也 要之孟子所就雖猶不及顏子然其所志已  
在孔子則雖顏子亦在所舍矣

伯夷伊尹何如曰不同道

芟二條藏十七字

言與已不同道蓋已之志在學孔子則伯夷伊尹亦

為不同道矣下云乃所願則學孔子也然則伯夷伊  
尹雖皆古聖人亦未免為不同道曰不同道就是姑  
舍是之意如此說方答得何如之問何如者言夫子  
肯處之否曰不同道則亦在所不處矣 雲峰曰姑  
舍是者孟子以顏子具聖人之體而未極其大故欲  
學其大曰不同道者孟子以伯夷伊尹有聖人之德  
而未極其全故欲學其全

治則進亂則退

藏六十九字

伯夷無治則進之實事此只是伴說蓋論亂則退則  
治而進必然矣 又問伯夷何以見其治則進曰如  
文王作興白盍歸乎來曰非也此所謂來就養非求  
仕也 可以久則久久於其國也 可以速則速去  
之速也 問仕止久速如何分曰仕止以出處言久  
速以去就言危邦不入亂邦不居去就也有道則見  
無道則隱出處也

伯夷伊尹於孔子若是班乎

斐一條



公孫丑所見粗淺孟子告以乃所願則學孔子則伯夷伊尹於孔子其高下已判矣彼乃因皆古聖人也一句而復問曰伯夷伊尹於孔子若是班乎可見其學識所到自生民以來未有孔子也此句似只承上節仕止久速之各當其可而言然以下文敢問其所以異數段證之則又是以事功言大抵孔子只是一箇孔子自古聖人則自羲皇堯舜以至伯夷伊尹柳下惠之儔皆古聖人也以孔子之時中言之則伯

夷伊尹柳下惠等數聖人所未有以孔子之事功言之則義皇堯舜等羣聖人所未有蓋孔子一身其時中之道既集伯夷伊尹之大成而其事功之盛又集堯舜禹湯羣聖人之大成也故曰兼說為盡

然則有同與曰有云云

通下三題七條更定次序減二十九字

得百里之地而君之皆能以朝諸侯有天下

不以土地甲兵之力也德何盛哉其處心之正雖使行一不義殺一不辜而可以得天下亦不肯為此無

事實不如此說無以表其德之盛心之正處此孟子之  
所以為辯

行一不義殺一不辜而得天下皆不為也

況於枉尺直尋乎 朱子曰以其讓國而逃諫伐而  
餓非道義一介不取與觀之則可見 以百里而王  
天下德之盛也 註苟非其德之盛安能以百里而王  
天下邪德之盛則近悅遠來所謂仕者皆欲立於王  
之朝耕者皆欲耕於王之野矣 根本節目之大註

新安陳氏曰德之盛根本之大也心之正節目之大也蓋聖人之所以得為聖人者根本全在德上故德之盛為根本之大然取與之際最是大節目處假使行一不義殺一不辜所失者如此其小而可以得天下所得又如此其大彼亦不屑為之其存心之正如此故曰心之正為節目之大也問根本節目分乎曰分何而言之曰凡一草一木根本自是根本節目自是節目二者既不可混而為一則於此借言之

獨無分乎故分如上根本節目之分而為枝葉

敢問其所以異

宰我子貢有若智足以知聖人分明是高明了然縱使其汙下而不高明諒亦不至阿其所好而空譽之夫雖汙下尚不至於阿所好則其言之可信也明矣故曰明其言之可信也三子者之言本出一時已見而萬世之下無異詞焉益以見其智之明也

以予觀於夫子賢於堯舜遠矣

第二條藏二百四十字

夫子推明羣聖人之道以垂後世一世用之則夫子  
一世之治功也十世用之則十世之治功也百世用  
之則百世之治功也千萬世用之則千萬世之治功  
也以此言之其理賢於堯舜且遠亦宜矣 此程子  
事功之說所以最為有功也然此等事功亦非堯舜  
不能為夫子獨能為之乃其所處之時不同故耳使  
堯舜若當孔子之時道既不得行於當時則亦必將  
集先聖之大成以垂法萬世無疑矣若使孔子得為

堯舜亦無事功矣而謂夫子之聖實有盛於堯舜乎  
程子曰語聖則不異事功則有異此程子之言最  
為有理但亦未審宰我本意果是如此否如下條子  
貢云自生民以來未有夫子也有若曰自生民以來  
未有盛於孔子也亦盡以事功言乎抑又是宰我子  
貢有若自見夫子之聖而不及見羲皇堯舜之聖故  
以為前此所未有乎周人謂武王克商之功于湯有  
光然以今觀之武之功亦未必過於湯也如伊川謂

明道曰孟子之後一人而已而後人稱邵子朱子亦皆謂秦漢以來一人又何其一人之多邪愚此疑人未有不以為狂妄者清以為羣聖人之道皆盛行於當時而寢微於其後獨吾夫子之道雖湮晦一時而愈章明於後世吾夫子之道明則羣聖人之道亦隨之以不墜矣此天下之所以通祀夫子而共宗其道無或間然者也由漢至今世振一世則後乎千萬世可知矣



見其禮而知其政聞其樂而知其德 芟一條減八十九字

此是子貢由百世之後等百世之王的訣子言今日  
見其所遺之禮而可以知其當日之政今日聞其所  
遺之樂而可以知其當日之德在當日者既與其人  
俱往矣而禮樂之遺於後者尚未與之俱亡固可即  
此而推之 問見禮知政聞樂知德是謂夫子是謂  
他人曰是大槩說之孔子亦在其中子貢所以知夫  
子為生民以來所未有亦以此耳 不但王者今人

但於禮度之間從容中節是必有設施措置者矣但其發於詞氣之間音吐洪亮而氣調平和則其所存斷然可知如夫子溫良恭儉讓在鄉黨而恂恂入公門而鞠躬禮之行於身者無過不及周旋中度如此其見於設施者蓋必有所謂立之斯立綏之斯來動之斯和者夫子之樂雖無所考必其聲氣之中和節奏之克諧有所謂始作翕如從之純如皦如繹如者於此味之則其德之中正和樂粹然無偏倚駁雜

之弊亦可知矣 然則夫子亦有樂乎曰有子與人  
歌擊磬於衛弦誦於陳皆樂也不必謂只和便是樂  
為聞字說不去 如舜之德性之也武王之德反之  
也皆於其樂見之政乃其施於外者德乃得於中者  
有若曰豈惟民哉

藏十六字

有若本意只是就民類言其曰麒麟之於走獸河海  
之於行潦類也特用以比況耳故下即承之曰聖人  
之於民亦類也以終首一言之意也而下又繼之曰

出於其類拔乎其萃只承聖人之於民亦類也說不  
必兼麟鳳山海須觀其意之所主蓋既露出聖人之  
於民亦類也則不必復粘泥着麟鳳山海矣彼皆客  
辭客意也 出於其類拔乎其萃二句言自古聖人  
固皆異於衆人也 此二句似重拔乎其萃又是形  
容那出於其類一句 程子曰孟子此章擴前聖所  
未發註依程子他日謂橫渠西銘與孟子性善養氣  
之論同功則是擴前聖所未發者只謂養氣而小註

乃曰指養氣知言而言也蓋聖人復起必從吾言之  
意亦見是發前聖所未發雲峰小註所謂闢異端  
承聖道云云者全不可憑

以力假仁者霸

章文一題三條減二十五字

此章論王霸之辨最為深切而著明蓋王霸之辨只  
是誠偽之分王者霸者其操術固有誠與偽之異而  
人之應之者亦隨其所感而異然則天下之理其得  
失可以坐判而有世道之責者宜知所自責矣此

章仁字宜以天理之公言 孟子意謂人有恒言曰  
王霸究其所以為王霸者何也如本非有為仁之真  
心乃以其土地甲兵之力而借事以為仁者斯則霸  
矣然霸者必有大國苟非大國則無其力無其力則  
亦無其仁也無其仁則亦何以能霸哉若夫理得於  
心之謂德自吾之得於心者推之無往而非仁鑒鑒  
乎皆濟人利物之實事也斯則王矣王者之仁只自  
胷中流出無假於外故王不待乎大國矣如湯以七

十里而王文王以百里而王何待於大哉 王字或  
讀如字或讀去聲未知孰是 前篇寡人之於國也  
章註曰凡有天下者人稱之曰王則平聲據其身臨  
天下而言曰王則去聲後皆放此則王讀作去聲為  
長 若王霸字相連則平聲 按此章言王霸之辨  
只讀如字亦可謂以力假仁者是霸也以德行仁者  
是王也若作去聲則是謂以力假仁者霸諸侯以德  
行仁者王天下 王則朝諸侯以有天下霸則挾天

子以令諸侯而其名實俱不同大抵行霸道而霸行王道而王此王字亦平聲謂以力假仁者是霸便只是霸諸侯而已謂以德行仁者是王便是王天下者義亦兼之蓋其道如此則其功效亦如此所謂行霸道而霸行王道而王也 此處若讀作去聲則上章雖由此霸王不異矣亦當作去聲而大註所謂如此而成霸王之業與此章註論王霸者多矣王字自為平聲 饒氏曰齊問罪於楚以尊周為主其事屬義



孟子不說假義却說假仁蓋仁包五常言仁則義在其中如伐原示信大蒐示禮皆是假仁處 愚按饒氏引伐原示信大蒐示禮謂假仁字兼義禮智信固是但詳左氏本旨則於以力假仁及大註中假借其事以為功以力服人非心服力不贍等語俱不切

按假借其事以為功如救邢存衛定襄王定王世子之類方是假仁之功然此非以其力亦不能糾合一時諸侯以為此事蓋其心不信於人故須以力驅之

耳如湯征自葛始天下信之則不同矣

以力服人者

斐三條減一百二十三字第四條剪裁湊合

以力服人者謂以力得人之服也非謂用這力去服  
那人也義亦小異當辨 下條虛空突出以力服人  
以德服人字蓋上文已藏得有以力服人以德服人  
意了如富與貴是人之所欲也一條雖未露出仁字  
然於富貴則不處於貧賤則不去這便是仁了故下  
文即承之曰君子去仁惡乎成名與此相同 霸必

有大國端的是以力服人王不待大端的是以德服人七十子之服孔子也自古帝王孰非得人之心悅誠服乎而必獨以七十子服孔子為譬者蓋孔子布衣耳初無勢力位號又當時亦極流離困苦而七十子咸心服之而無所強此尤可見其心悅誠服處故朱子曰七十子之服孔子至於流離飢餓而不去又非有名位勢力以驅之也孟子真可謂長於譬喻矣無思不服言無不心服也故詩傳云無思不服

心服也蓋本孟子與中庸神之格思不可度思之思不同上節是言王霸之心誠偽不同下節是言人之所以應之者其不同亦如此

仁則榮不仁則辱

章句一條減一百八十七字

預收賢能以實吾國一旦國家可以有為則遂及時而使賢者能者各効其力以明其政刑則吾仁矣如是則雖大國必畏之矣仁則榮理固然也賢者在位尊賢也能者在職使能也在位在職自不同離

騷經首篇第三條又重之以修能註云能獸名熊屬  
多力故有絕人之才者謂之能 貴德猶尚德也士  
則指其人而言之賢有德者才有能者註德字單言  
則兼才亦亦是德之用如才難不其然乎才亦兼德  
士則指其人指有德之人也下句賢者能者皆士也  
賢者未必無能但以人君所以處之者所重在德  
故置之尊位以正君善俗且正君善俗亦不是空坐  
無為者政刑二字盡之矣 賢者在位則足以正君

而善俗能者在職則足以修政而立事兩足以宇  
好看是未見於修政立事然既有其人則已足以  
修政立事正君善俗亦然 國家閒暇及是時明  
其政刑補當以下文及是時般樂怠傲相對看問  
何以及國家閒暇乃明其政刑也曰戰國之時七  
雄虎視無日而不干戈之逞無歲而不城野之爭  
國家多事常是危急存亡之秋故孟子有此云彼  
般樂怠傲者方其未閒暇時亦不得以般樂怠傲

故云及是時

詩云迨天之未陰雨

云

侮予

並題下減九十九字

此章亦為鳥言我及天未陰雨之時而往取桑根以纏綿巢之穴隙使之堅固以備陰雨之患則此下上之民誰敢有侮予者亦以比已深愛王室而預防其患難之意故孔子贊之曰為此詩者其知道乎能治其國家誰敢侮之此出鴝鵒之詩然所謂鳥非指鴝鵒鴝鵒鳥之害也以迨天之未陰

雨比及時以徹彼桑土綢繆牖戶比明其政刑以今  
此下民或敢侮予比雖大國必畏之 今此下民註  
曰在下之人詩傳曰下土之民一也蓋鳥之巢在民  
居之上故曰下民 其實鳥雖善為巢下民無知者  
將莫如之何耶以意逆志可也 或敢侮予或即下  
句誰字也

為此詩者其知道乎

知道只是知道還他不要說是治國平天下之道蓋



率性之道亦道也治國平天下之道亦道也但不  
宜先說出下文能治其國家誰敢侮之道斯在矣  
知道云者其知此而已知道是通套字雲峰之說  
稚也

今國家間暇及是時般樂怠傲

云芟一條藏十字

正韻般旋也運也般樂蓋樂而又樂樂而忘返故有  
般旋之意此所謂縱欲也怠惰也傲恣慢也此所謂  
偷安也般樂怠傲不恤政刑也不恤政刑無求於

賢才而惟姦諛是崇是用矣自與本文相反對不必如饒氏所分

禍福無不自已求之者

芟十九字元誤在此

禍福榮辱也自已求之者仁不仁也

詩曰永言配命自求多福

詩傳云欲念爾祖在於自修其德而又常自省察使其所行無不合於天理則盛大之福自我致之有不求而自得矣言猶念也註大抵言者心之形念之

所在也故解之為念凡人所存所念往往於言語間  
見得心存在於是則其言亦不覺出於是不曰永念  
配命而曰永言配命亦見古人心口如一之意 命  
天命註詩作天理

太甲曰天作孽云云可活楚一條

天作孽如水火盜賊之災誠猶可避至於放僻邪侈  
以陷乎罪姦盜詐偽以失其身者是真無所逃於天  
地之間而舉天地之間皆為牢獄也

尊賢使能俊傑在位

賢者尊之能者使之便是俊傑在位處俊傑在位言在位皆非掎克庸劣之徒也 俊傑即賢才故曰才德之異於衆者以其異於衆故曰俊傑

市廛而不征法而不廛 市字微讀不與廛字相連

關譏而不征 關字微讀不與譏字相連

耕者助而不稅 耕者與市關字一例助而不稅與廛而不征一例

廛無夫里之布 廛字與上條市字關字耕者一例大  
註市廛之民已賦其廛此廛字帶賦字又與本文小  
異

天下之士民中俊秀 天下之商在市曰商 天下  
之旅在途曰旅 天下之農以耕曰農 天下之民  
以居曰民 其實民未必不為農與士商亦未必不  
為旅

市廛而不征法而不廛

芟一題并題下共十三條

市與廛亦不同市是大統言廛是市中列肆故曰市宅也官為之者蓋逐末者多則廛以抑之少則不必廛也其多少以貨言逐末者多則廛以抑之者為其厚於利也少則不必廛者官為廛以居之亦不取其廛之稅也問市廛此市在何處曰此都邑之市國都如井田樣畫為九區面朝背市左祖右社中一區君之宮室宮室前一區為外朝朝會藏庫之屬皆在焉後一區為市市四面有門每日市門開則

廛而不征法而不廛之廛是活字廛無夫里之布之  
廛是死字

廛無夫里之布

楚五條減五百二十一字剪裁合更定次序

周禮宅不毛者有里布民無職事者出夫家之征註  
孟子本文夫里之布夫字內附有家字布字內附有  
征字周禮夫家之征征字內又附有稅字布字征字  
稅字正是一例不可謂廛無夫與里之布也 一里  
二十五家之布一夫百畝之稅一家力役之征先王

設此本以罰游惰之民非常賦之制也如市宅之民已賦其廛猶為常制今既廛之又令出夫里之布不以為罰乃以為賦戰國之君蓋亦不復知夫里之布之所自來矣可歎哉 所謂布縷之征粟米之征力役之征是惟正之供者常法也此所謂一里二十五家之布一夫百畝之稅一家力役之征却是先王所設以警游惰之法非常制也後之暴君污吏乃承之以為常制之名色遂使民不聊生爾 文獻通考馬



端臨曰鄭註謂令出一夫百畝之稅一家力役之征重并出耶曰大抵布以里計稅以夫計力役以家計家者八家同井之家也有夫便有家如此看則是未免并出也蓋罰其游惰不得不重不嚴也市廛而不征就市上廛之故曰廛市宅也此是前朝後市之市廛無夫里之布之廛字願受一廛而為民之廛也前主商言此主民言總只見一箇廛廛是民所居以為市者先王之時逐末多者上則廛之而不征其

少者則惟法而不屢至戰國時不復問其逐末之多  
少一槩皆屢之矣既屢其居又征其貨又以額外所  
罰游惰者為常額而并取之非惟受在市一切之賦  
又併出在田無名之征蓋周禮宅不毛者有里布民  
無職事者出夫家之征此決然不指市宅之民蓋一  
在市宅便是為商為商便是有職事有職事便難責  
以種桑麻矣戰國時都不問但見前時有此名色便  
以為名而賦於民宅不種桑麻者註此主宅內言

謂荒其地也 民無常業者註此主游手游食言常  
業謂工之作商賈之貿遷貨財也不兼士之學言只  
指市宅之民亦不兼農言 集註云市宅之民已賦  
其廛者言其在市在廛也則非宅不毛與無職事者  
矣豈應復令出此夫里之布哉

信能行此五者

戒四十五字內借上字換條首此字

上五條且條舉王道而言其理如此此則言當時人  
君誠能使彼鄰國之民仰之若父母吾為其父母則

彼為吾子弟矣率子弟以攻父母其誰能舉之

人皆有不忍人之心

芟一條戒一百二十九字

不忍人忍字是反字饒氏謂人心慈愛惻怛才見人便發將出來更忍不住者非是不忍人不忍害人也

天地以生物為心云云之心以為心註天地無心而成化此何以云以生物為心邪曰天地別無勾當只是生物而已則其所主宰者在此此便有心之道春生夏長秋收冬藏四者若作陰陽對看則春夏

主生秋冬主殺復所謂復見天地之心者也若生意  
流行則春夏主生秋冬主成同歸於生物也所謂維  
天之命於穆不已者也天地生物之心只是元亨利  
貞 真氏曰天地造化無所作為往古來今生意周  
流萬物從天地生意中出故物物皆具此理何況人  
為最靈宜乎皆有不忍人之心也 問人皆有不忍  
人之心是說性是說情曰是亦情也故下條解怵惕  
惻隱云此即所謂不忍人之心也又曰因論惻隱而

卷十  
悉數之則與不忍人之心一類也 人皆有不忍人  
之心此一句兼四端此章重擴充章首二節當做大  
旨看自所以謂人皆有不忍人之心者以下是說人  
當如先王有以推不忍人之心前只言不忍人之心  
後兼言四端分明統四德前是專言之仁後是偏言  
之心

先王有不忍人之心斯有不忍人之政矣

並二條

先王有不忍人之心斯有不忍人之政者胷中無一

物以障之故天理自然流出無壅蔽也衆人雖有不忍人之心然物欲害之則為他隔着流不出來矣故人皆有所不忍而又須達於其所忍也達之於其所忍則須察識擴充 大註故不能察識而推之政事之間此政事衆人俱有與發於其政害於其事之政事同 惟聖人全體此心註全體字與上文物欲害之一句相反照本文先王有不忍人之心此一句無全體意朱子解之以為先王有不忍人之心何以便

有不忍人之政邪先王全體此心無物欲之害故也  
此朱子釋經之法 全體此心隨感而應註由仁義  
行者也不待着力察識而擴充之察識擴充其次致  
曲者也有不忍人之心斯有不忍人之政矣是自然  
能充者也看斯字最緊

治天下可運之掌上

蓋以不忍人之心行不忍人之政則老者衣帛食肉  
黎民不飢不寒然而天下不治者未之有也 人皆



有不忍人之心此句如云人皆有之先王有不忍人之心此條如云賢者能勿喪耳非為先王詳也故下條即接之云所以謂人皆有不忍人之心者不然是隔著先王一段了

所以謂人皆有不忍人之心者

藏四十八字

怵惕惻隱四字不忍人之心之目也其形容也怵惕在先程子曰滿腔子是惻隱之心朱子所謂纔觸着便是這箇物事出來大感則大應小感則小應

腔子是指身不是指心滿身都是這生生之心所在也故曰惻隱之心人之生道也凡知痛癢處都是仁腔子是活套字不指竅子也朱子曰猶言軀殼耳非惡其聲而然也

是惡被不救人之名真氏謂不仁之名愚謂今人乍見孺子將入於井皆有怵惕惻隱之心只是乍見時光景未說至救處亦當辨也只用不仁之名說然既怵惕惻隱則隨而救之矣

無是非之心非人也

是非是活字是其所是非其所非也

惻隱之心仁之端也

斐二條

因情以見性也性無而情有 心統性情者也註承

上文言惻隱羞惡辭讓是非情也仁義禮智性也心  
則統性情者也心既統性情故惻隱羞惡之屬亦曰  
心也

人之有是四端也猶其有四體也

減三十二字補首條

此二句是起下句自賊與賊其君之意謂之猶其有四體蓋以見其必有也意尤明切 或謂前言無惻隱之心非人也四句言情為人所必有此言人之有是四端猶其有四體也二句言性為人所必有此說非也端是見於外者非性也為此說者蓋不知此節上二句是起下句 自謂不能者物欲蔽之耳註此句人皆以貼在自賊者也愚謂不然只推原所以自謂不能之故 謂其君不能者不勉之以不忍人之

心行不忍人之政也

凡有四端於我者知皆擴而充之矣

擴推廣之意註有所不忍而達之於其所忍也有所  
不為而達之於其所為也即中庸所謂致曲 註知  
皆二字緊要

若火之始然泉之始達

易字上元多一有字

若火始然泉始達所以日新又新有不能自己如此  
者蓋因其有而有易為力也若非本性所有安得一

擴充之而遂沛然熾然之不可禦

苟能充之足以保四海

此是仁無所不愛義無所不宜禮無所不敬智無所不明

苟不充之不足以事父母

斐十條

事父母亦須用四端無四端則不孝矣何以事父母

大註知皆即此推廣而充滿其本然之量一此字

指上文四端在我隨處發見者言又云能由此而遂

充之此字又指知皆即此推廣而充其本然之量則其日新又新將有不能自己者言二此字所指不同以不忍人之心行不忍人之政治天下可運之掌上自然也知皆擴而充之若火之云云保四海勉然者也其道一也苟能充之足以保四海是有不忍人之心而能察識擴充之以行不忍人之政者也至於足以保四海則亦治天下可運之掌上矣此章大抵亦如仁則榮及矢人豈不仁於函人哉二章皆

為當時諸侯發 此章所論人之性情心之體用本  
然全具而各有條理註人之性情即心之體用也本  
然全具體也即四德之渾然在中而未發者也各有  
條理用也即四德之發於外隨感而應者也雲峰之  
說自明白 四端之信猶五行之土無定位無成名  
無專氣成名之名職名也不然則既名曰土矣又何  
謂無成名 如知縣之名專治一縣知州之名專治  
一州此成名也 木位乎東金位乎西火位乎南水



位乎北皆有定位也而土則惟寄乎四者之間是無  
定位也木以生發為名火以明盛為名金以堅利為  
名水以源活為名皆有成名也而土則惟寄乎四者  
之中是無成名也至若木火金水各得生長收藏之  
一氣是皆有專氣也而土則惟寄乎四者之間是無  
專氣也 定位成名以質而語其生成者也專氣以  
氣而語其流行者也有是位則有是名故以名次位  
四時寄土以氣言也 水火金木無不待是以生者

註如每季九十日各除未十八日為土春木未十八日為土則木之所以生火者此也夏火未十八日為土則火之所以生土為旺又因以生秋金者也秋金未十八日為土則金之所以生水者此也冬水未十八日為土則水之所以生木者又此也

矢人豈不仁於函人哉章

孟子曰矢人之本心豈固不仁於函人哉然以其術言之矢人惟恐其矢之不利而不傷人一何其不仁

函人惟恐其甲之不堅而至於傷人一何其仁巫匠  
亦然巫者為人祈祝利人之生又何其仁匠者作為  
棺槨利人之死又何其不仁此無他皆術使之然也  
故人之於術不可不慎也此術字不只是藝術而已  
然矢函巫匠所治者亦不可不謂之術也本文惟恐  
字大註二利字最重皆以心言心以習異也 孟子  
此說嘗有戲反之者曰矢人似不仁於函人然為軍  
者得矢以射賊則未害於仁為賊者得甲以自衛則

函人為助虐矣巫為人祈生亦有罔之生也幸而免者匠者作為棺槨死者人所不免何無棺槨則委於溝壑由是言之匠之仁大矣

故術不可不慎也

此句最重孟子一生受用萬古光明亦是善擇術來此說之意非為矢函巫匠設也 惻隱之心人皆有之性之本善也矢人惟恐不傷人匠者利人之死習之不美也術之不善也

夫仁天之尊爵也人之安宅也

焚四條減十字更定次序

仁者天地生物之心得之最先註得之最先不是得  
仁在義禮智之先朱子曰人得那生的道理所謂心  
生道也有是心斯有是形以生也得之最先已有  
尊爵之義兼統四者亦為尊爵之義在人則為本  
心全體之德註味此一句則知天之尊爵也一句是  
緊帶天德之元上說故註引元者善之長也其曰得  
之最先是有人以得之然且以付與之際言是主天

言也故下註曰在人分明一天一人二字對說然又不可截斷為二蓋既謂之仁則屬人矣夫仁天之尊爵也猶云誠者天之道也就人分上指出天說

兼統四者註看來只是兼統義禮智如何說統四者曰有仁之德有仁之義有仁云云之智豈不是兼統四者 仁兼統四者則仁當性字也 在人則為本心全體之德亦為單言則包四者之義 仁為天之尊爵人之安宅則仁道之關係於人者大矣莫之禦

而不仁是昧於擇術也不智孰甚

是不智也不仁不智止人役也

夫人之所以不仁者固由於是非之心不明然既以  
是非之心不明而不為仁則其心日益昏頑而自此  
又不智矣不智則懵然無知又何有於禮義是其身  
無一之足貴而自流於污賤之歸矣孟子曰夫人必  
自侮而後人侮之滄浪之水濁斯濯足矣以用工  
之序言則先智而後仁以自然之理言則先仁而後

智故上文云莫之禦而不仁是不智也下云不仁不智人役而恥為役以下皆是激而進之辭

如恥之莫如為仁

其初所以致此恥者由於不仁故恥之則莫若反其所為而為仁

仁者如射

減三字

承上文如恥之莫如為仁說為仁便是仁者仁者如射一句之下皆就射上說而為仁由己之意在於



言外猶有為譬若云云九仞以下皆就掘井而有為者必底于成之意亦在言外

仁者如射云云已而已矣斐一條減八字

反求諸已而已矣本文屬射者愚謂似為當時諸侯言諸侯之反求諸已如何如貴德而尊士賢者在位能者在職云云畏之矣何至為人役之有饒氏一說甚當

子路人告之以有過則喜

戒二十字

仲由喜聞過令名無窮焉註非是說喜聞過一事令名也因喜聞過而勇於自修故有善可稱而令名無窮也

禹聞善言則拜

臧三十字

禹聞善言則拜反不若舜之不拜者猶有物我之分也猶是未免見善之在人也

大舜有大焉善與人同

斐一條臧四字第二條出下題

善與人同內無嫌於己外無德於人真以天下為一

家氣象視聞善而拜者誠為有間矣非孟子不足以識此 善與人同此善字以天下之公善而言不可認作舜之善故曰善者天下之公理

舍己從人樂取於人以為善

芟二條減九十九字

舍己從人舍己字重從人即是樂取諸人也舍己之未善而取人之善以為善也二句只是一事故下只言無非取諸人者 朱子曰舍己從人言其不先立己而虛心以聽乎天下之公蓋不知善之在己也樂取

於人以為善言其見人之善則至誠樂取而行之於  
身蓋不知善之在人也 若究其極則當合二句言  
外不知善之在人內不知善之在己非惟不知善之  
在己其無係吝氣象亦若不知未善之在己也 下  
文無非取諸人者一句實兼物我兩忘之意愈見得  
當合二句言

自耕稼陶漁以至為帝無非取於人者

芟一條

耕稼謂耕那稼也稼以禾言詩曰在田曰稼

取諸人以為善

不可謂只是取人之善言如好問用中之說耳須兼言行故曰聞一善言見一善行若決江河沛然莫之能禦也

是與人為善者也

與猶許也助也許助二字亦難曉今姑以近語贊之取諸人以為善則是引其人以為善矣所謂許與同是引之之意取諸人以為善自他人觀之只見得

是取人以為善而不見得又是與人為善也唯孟子則便見得至此

故君子莫大乎與人為善

孟子以與人為善為莫大之善然則聖賢之心何心哉故曰有朋自遠方來不亦樂乎得天下英才而教育之三樂也此章言聖賢樂善之誠初無彼此之間註子路人告之以有過則喜喜出於誠也禹聞善言則拜拜出於誠也舜之舍己從人又不待言矣子

路之喜聞過禹之拜善言舜之舍己從人同一樂善也彼此之間註今人以由禹與舜分彼此非也是以人已分彼此子路聞人告以過而喜子路樂善之誠不以彼此而間也禹聞善言則拜是禹樂善之誠不以彼此而間也故下二句俱通三人說朱子統觀此章之文而總其旨以示人也蓋孟子之說分殊也朱子之說理一也聖賢之言時有足前人之所未備者此類是也如綱目王何必曰利悉改王字為君

伯夷非其君不事非其友不友

芟一條減十三字

此條是節節說深去不立於惡人之朝不但非其君  
不事足亦不立其朝不與惡人言非但非其友不友  
口亦不與之言 或說不立於惡人之朝只是非君  
不事曰非也宜別說而深一節且如孟子不仕於齊  
梁然豈不亦暫立其朝邪又如人臣當為君聘於鄰  
國春秋之時常有之豈不亦暫立其朝邪與人言亦  
未便是與為友也今人所與言亦多矣豈箇箇是友



邪 塗炭塗是泥炭是火

推惡惡之心思與鄉人立

鄉人又未至於惡人推惡惡之心至此者極言之也  
又深一節推孟子推之也思伯夷自思見得如此也  
其冠不正 鄉人之冠不正也

推惡惡之心云云 挽焉

此無實事而孟子本其心而形容之如此耳

是故諸侯雖有善其辭命云云 第二條出上題

此却是實事自推惡惡之心至此文勢相連 是故  
二字承上文 辭命雖善而其人未善也故亦不受  
若孔子則交以道接以禮斯受之矣

不受也者是亦不屑就已

只就諸侯說衆人亦可知解其不受之故由其心之  
不屑也清之極也真是聖人之清非尋常之清 不  
屑之屑趙氏曰潔也一說也 說文曰動作切切也  
又一說也 不屑就言不以就之為潔而切切於是

也此朱子之說又兼二說也蓋惟不潔之故不切切之也故兼說得非調和之謂

柳下惠不羞污君

柳下惠姓展字禽名獲居柳下而謚惠故曰柳下惠蓋後人尊之之辭故不姓名字之不羞污君不卑小官是進也然進不隱賢而必以其道必以其道則未免於遺逸阨窮矣然遺逸而不怨阨窮而不憫阨窮深於遺逸遺逸與阨窮不同遺逸是去位也阨

窮是困也阨窮是遺逸後事 夫不羞污君不卑小

官和也進不隱賢必以其道云云不憫是和而介也

夫和而介則雖不絕於惡人而實未染於惡人故其

自言曰爾為爾我為我雖袒裼而露臂裸裎而露體

於我之側其無禮如此爾亦焉能浼我邪唯其不能

浼我故常由由然與眾人並處而不自失焉自進不

隱賢至不自失皆是說他介處惠所以由由然與之

偕者恃此而已不然則亦不能終其和矣此所以為

聖之和 與之偕之字指爾為爾者言不必拘袒裼裸裎 援而止之而止言欲去之際援而止之則亦止也泛說

是亦不屑去已

戒九字移一條入上題

言不以去為高而必於去也 不屑去之意何以見得蓋是所謂直道而事人焉往而不三黜故不屑去有留之則亦留也

伯夷隘柳下惠云

不由也

戒二十三字與存疑合

伯夷雖是聖之清然既專於清則有當和處亦不能為和矣此其弊之隘也柳下惠雖是聖之和然既專於和則有當清處亦不能為清而玩視一世只和光同塵矣此其弊之不恭也 不恭朱子謂是待人不恭語錄曰是他玩世不把人做人看如袒裼裸裎於我側是已邵堯夫正是這意思如皇極經世書成封做一卷題云文字上呈堯夫 愚謂是有待於後世子雲之意思愚謂桀溺曰滔滔者天下皆是也正是不

恭

公孫丑章句下

天時不如地利

斐二圖六條減二百六十四字更定次序

破意舉用兵所恃者而第其輕重示人當知所重也

天時二字兼時日支干孤虛王相之屬支干不出

於時日孤虛王相不出於支干時日有支干而支干

有孤虛王相也 蔡氏曰時四時也日日辰也 時

主蔡氏說該十二月在其中日則該十二時此猶年

有四時而錯舉春秋二字以該之也皆以五行生克  
論如十干則東方甲乙木南方丙丁火中央戊己土  
西方庚辛金北方壬癸水十二支則東方寅卯木南  
方巳午火西方申酉金北方亥子水中央辰戌丑未  
土而又有納音之五行如甲子乙丑海中金甲乙不  
為木子不為水丑不為土而總謂之金也此又別是  
一道 孤即是空亡問何以謂之空亡甲子旬中遁  
至酉而十干足以無戌亥為空亡甲戌旬中遁至未



而十干足以無申酉為空亡餘倣此 虛者子實則  
母虛如甲乙木實則壬癸水虛丙丁火實則甲乙木  
虛之類 旺相者如春木旺木生火則火相夏火旺  
火生土則土相旺者為主相者輔之 孤虛一類然  
孤自孤虛自虛王相一類然王自王相自相 次乎  
王者為相得其助也敵乎王者為孤以相克也生乎  
王者為虛子實則母虛也大意蓋如此 之屬二字  
所該者廣其在兵家不止孤虛王相而已 天時地

利人和看來兵家天時一事亦其甚靈者如春秋世  
歲星在越而吳伐之三十六越卒滅吳晉時符堅  
犯歲伐晉卒以敗亡當其將伐晉時其臣諫如歲星  
在晉不可伐堅曰我昔滅燕亦犯歲而克不知肥水  
之敗燕慕容垂遂以復興燕業天時有如此不爽者  
況於地利況於人和乎 然天時終不如人和歲星  
在越而吳伐之卒為所滅者非獨天時之不利越無  
罪吳無德吳恃強好大耳故敗漢高入關之年歲在

東井井秦分也而秦見滅何哉秦實無道歲星不能  
為福而反為禍也又如周武以甲子興師而勝紂亦  
以甲子興師而敗宋劉裕伐南燕以七日而勝故曰  
天官時日明將不法闇將拘之

三里之城七里之郭

條

此條申天時不如地利就攻上說

城非不高也

條芟二條

此條申地利不如人和就守上說

故曰域民不以封疆之界

條減二十三字末二條舊合為一

此條重在得道多助一句其封疆山蹊意不主地利

言此節兼地利專言得人和之所以在得道此聖賢之兵法也所謂不戰而屈人兵也 此段極言有國

者當務於得人和也或說是得人和之本在於得道此說於理亦無害但未必其本意也蓋孟子但謂要得人和內便含有得道意不必再推一層再序一段也看故曰二字可知而其旨意又歸在下文以終所

言之意也 威天下不以兵革之利兵固是利革何以亦謂之利曰此猶夫里之布該征稅字意也得道大要在於用賢而愛民所謂貴德而尊士與施仁政於民也 親戚者相親愛則相憂戚也

故君子有不戰戰必勝矣

戒十四字

此以人和言之 非惟天時之善人為之乘地利之險人為之守亦無假於天時之善地利之險矣

孟子將朝王

孟子之在齊此時實處賓師之位非受祿有官職者  
比凡人君之於賓師若欲有所訪則當就而見之不  
可以召見或賓師以事自請見之固亦可也

寡人如就見者也

芟二條

如往也 朝將視朝上朝字謂來旦也 朝將視朝  
不識可使寡人得見乎分明是召 問孟子本欲朝  
王雖王託疾以召若可往也曰彼自往朝則非往召  
猶可也今既有召命而往則是賓師應召矣孟子所

以執而不往

不得已而之景丑氏宿焉

盖欲歸則以仲子之要而勢有不獲欲往則以齊王之召而義有不可是為不得已 景丑氏景姓丑名氏指其家而言

內則父子外則君臣人之大倫也

芟一條補題四句

按人之大倫有五則自父子君臣以至夫婦朋友長幼皆是大倫今此特以父子君臣為大倫則自夫婦

兄弟朋友亦皆為其次矣大抵以父子君臣而視夫  
婦兄弟朋友則父子君臣為大倫以夫婦兄弟朋友  
而視三族之屬九族之親鄉黨故舊之交則與父子  
君臣并為大倫矣當隨文解義其實五倫之首父子  
君臣 齊人無以仁義與王言者云云不敬莫大乎  
是補如此推起真是不敬孟子之言句句是事實此  
言最得其情

我非堯舜之道不敢以陳於王前

臧十三字



堯舜之道承上文仁義言露出堯舜字見其以堯舜望其君所以為敬君也

景子曰否非此之謂也

臧十五字

謂不論其心但以禮貌間論也

君命召止若不相似然

臧三十五字

孟子時在賓師景子以臣禮律之誤也孟子且未暇與明此一節但下云云亦以賓師論也

彼以其富我以止吾義

斐一條臧七十七字

仁則循理樂天而安貧矣故與富對說義則不苟受  
不以三公易其介矣故與爵對說其詞只兩平其意  
則重在仁義蓋富爵之與仁義自是抵對不過

夫豈不義而曾子言之是或一道也

斐一條

本不消如此說只緣景丑俗人恐他未信得到不得  
不如此提撥所以深明其言之可信也

爵一齒一德一

斐五條 戒三十六字更定次序

朝廷莫如爵故爵為一  
尊鄉黨莫如齒故齒為一

達尊輔世長民莫如德故德為一達尊三句所以申  
上爵齒德所以為天下之達尊耳非是又添隨所在  
而致隆一意也 輔世只是濟世如云輔之翼之以  
左右民皆就人臣之分言 長民長治也君長之長  
自天子至大夫士皆說得長民非長育之長也

惡得有其一以慢其二哉

熹二條戒六十四字

此句接上文當過文云夫天下三達尊今齒德二者  
皆在我而齊王僅有爵耳惡得有其一以慢其二哉

明其不可召也夫不可召而王召之則王疑於不足與有為矣故繼之曰故將大有為云云召之臣

必有所不召之臣

芟一條裁七字

不可說做不召乎臣也但要主人君言欲有謀焉則就之正是不召也必如是其尊德樂道乃可有為欲有謀焉則就之

帶上文看尊德樂道不如是謂不如是尊德樂道也非尊德樂道而不如是也德就賢者身上說

道就賢者所抱說如仁義忠信樂善不倦其德也如孟子所舉平治天下之具其道也

湯之於伊尹學焉而後臣之

有所不召之臣也故不勞而王斯大有為矣

桓公之於管仲學焉而後臣之

有所不召之臣也故不勞而霸斯大有為矣故將大有為之君須看一將字 今天下地醜德齊莫能相尚不能大有為也好臣其所教而不好臣其所受教

尊德樂道不如是無不可召之臣也 地醜無一箇

能辟土地德齊無一箇德稍優苟能好臣其所受教

則德進而地辟矣 德齊之德以所就功業言李斯

云王者不却衆庶故能成其德是也集註德業成之

德對業字言朱子用字也 此章見賓師不以趨走

云為敬註新安曰恭見於外貌者故於趨走承順言

之敬存於中心者故以責難陳善言之 則上下交

而德業成矣註天道下濟地道上行天地交而造化

成故人君常患於亢而人臣常患其卑苟人君能降志於其臣而人臣能亢志於其君則德業成矣此天地之大義也

王餽兼金一百而不受

一百鎰二千兩也一鎰二十兩也七十鎰一千四

百兩五十鎰一千兩

前日之不受是則今日之受非也

云云不受非也

重在非字上

孟子卷之十一  
夫子必居一於此矣

謂不免於一不是也

皆是也

主於義言故曰皆是不必說出皆是義也惟其皆適於義故得為皆是 陳臻之問只有是字無義字

辭曰聞戒故為兵餽之

遲辭二字有誤

當時列國各有封疆之界一出薛之關則非薛之令所能行矣故薛君之於孟子只得以金為之兵備而



還能解其備亦不能與之兵也

若於齊則未有處也

戒二十二字

處字一說是孟子無所處一說是齊王之餽無所處然以上文子將有遠行子有戒心照之則是孟子未有處也而齊王乃餽之則無辭矣 上文兩箇辭曰字重看正與此段未有處相應齊之餽便無辭是貨之也

謂以物餌之也從餌以去則為貨取矣兩貨字皆是

活字

孟子之平陸

平陸齊下邑註下邑屬邑也如云管下

子之持戟之士楚二圖 臧九字

戟大註有枝兵也趙氏德曰雙枝曰戟單枝曰戈

枝旁枝也 論語謀動干戈於邦內註戈戟也以其

一類也亦有枝也 失伍不在伍也 去之猶言除

之也故解作殺之 凶年凡有兵戎疫癘之類皆是

飢歲穀不熟曰飢也 溝壑溝長溝壑深谷有水者

求牧與芻

芻二條

牧牧地也蓋草場也就地食草也芻蓋刈去之草

何不致其事而去註致推而還之也下章蜺鼃致為  
臣而去註曰致猶還也

王之為都者

芻二條

邑有先君之廟曰都註蓋其邑嘗為先人所都後遷  
之他乃只為邑故猶有廟在而稱都也不然均是邑

也何此有廟而彼獨無廟邪

臣知五人焉 知識也

為王誦之

戒十五字

此句記述之言非孟子曰為王誦之也

王曰此則寡人之罪也

斐一條 戒十六字

蓋不得行其牧民之志而不去者距心之罪使不得伸其牧民之志者寡人之罪也 陳氏曰孟子一言而齊之君臣云云故邪註按悅不繹從不改意在齊

王不必兼距心若繹而改之不得自專則致其事而去耳何關於齊之為善國也

齊人曰所以為蚺鼃則善矣

今按孟子謂蚺鼃曰子之辭靈丘云云以言與只是

激之諫及至諫於王而不用致為臣而去此乃蚺鼃自行其志也如何是見得孟子為蚺鼃也曰不必如此蓋有言責者必言不得其言則去此自古士大夫去就之律令然也孟子使鼃言鼃既言時便是自如

此擬斷了用則留不用則去豈復有餘法哉況孟子云今既數月矣未可以言與其意便是謂苟不得言便當去耳亦可見蚺鼃之去亦孟子之為之也

有官守者不得云

云言則去

移二條入下題

輔氏曰蚺鼃有言責距心有官守又曰蚺鼃賢於距心以其能諫又能去

我無官守云

云

有餘裕哉

首二條出上題末一條出離婁篇

此時未嘗為卿於齊進退即去就也進字對退字

生 此孟子最高處蓋自見王於崇退而有去志便  
商量此一着了非常法也 孟子於齊未嘗受祿只  
處賓師之位故得從容於去就之間如此

孟子為卿於齊

戒七十七字

當時有所謂客卿大槩尊禮之而不居職任事召之  
則不往今此為卿於齊難說全是客卿後章註曰我  
前日為卿嘗辭十萬之祿則是實為卿但與他卿終  
是不同為不受祿故也又曰仕而不受祿就仕上見

得不全是客卿不受祿上見得不全是齊卿 王驩  
蓋攝卿以行故曰齊卿註不可依俗說謂孟子為正  
卿驩攝以行為齊卿也齊是齊國之齊齊卿猶曰漢  
使 南軒曰孟子雖為卿而實賓師也其使於滕齊  
王特借孟子以為重 問既是賓師如何謂之使曰  
所以使王驩為輔也此孟子所以不辭行也

夫既或治之 斐二條或九十字首條湊合

大註有司不指王驩朱子實是於或字生出有司字



問當時出使既有副使矣又焉用有司曰今之出使外國有正使有副使副使之下又有許多名色人等皆所以辦使事者而二使皆只是總大綱挈要領而已此事古今大畧相同 輔氏曰有司既已治之而得其宜矣自不須更與王驩言也蓋有難以顯言者故托此以告之

使虞敦匠事嚴虞不敢請

戒四十七字更定次序

使虞敦匠事為句嚴字另為一句 言當時心疑其

太美欲請其說庶幾少損之以事急而止 不曰木棺也而曰棺木也重在木字棺之美惡只在木之厚薄堅脆若制作無甚工否 董治作棺之事註董督也非自治也

非直為觀美也 云 使土親膚

虞蓋以為觀美 非直為觀美言俗有但為觀美之事者此却非也直字帶下讀先以非為觀美也然後盡於人心破之乃接之云雖必如是然後盡於人心

然使無財或法制所不得亦不得以自盡其心也下文又承之云所以得之為有財而遂用之者正為無使土親膚耳

不得不可以為悅

悅快也所謂盡於人心也

得之為有財斐二條戒一百九字移半條入下題

言得之而又為有財也 充虞之疑其於無財一節固無庸及惟疑其過制耳故孟子先引中古之通制

以釋之曰云云其於無財一邊亦無庸及矣却於下文反之曰不得云云無財云云既是得之為有財則可以求快其心矣無使土親膚即是上文註中所謂堅厚久遠者豈有兩三重意哉不以天下儉其親亦正所謂得之為有財也

且比化者無使土親膚

斐一條戒三十九字末條出上題

且比化者一條不是別一段意即上文然後盡於人心也尋常說者泥着且字遂為更端之語非矣且是

發語辭其實一意相承 化者死者也生變而為死  
故曰化 無使土親膚此是堅厚久遠處 其所以  
以此為盡心以此為悅者其歸在於無使土親膚而  
已 上文然後盡於人心處亦未得見此意出到此  
方云云蓋孝子仁人之用心正在此耳天理當如是  
勢又得如是而或不如是則是為天下儉其親矣

君子不以天下儉其親

芟一條裁十八字

大註送終之禮所當得為而不自盡是為天下愛惜

此物而薄於吾親也此物二字不專指棺槨是泛說也且曰吾聞之即古語也安知古語是為棺槨說邪或兼生事葬祭耳就此章言則是送終之禮天下猶言世上言無來由為世上惜此物而薄於吾親

沈同以其私問曰燕可伐與

斐一條

初燕王噲讓國於其相子之而國大亂有釁可乘齊人謀伐之時孟子在齊齊之君臣盖有利人土地之心而又恐為賢者所不與沈同盖齊臣中用事者故

以私問於孟子亦或齊王之陰使之也故私以其事  
問而卒行其事 季康子問弟子孰為好學孔子只  
對曰有顏回者好學云云不得如對哀公之詳矣今  
沈同以其私問孟子只告以燕可伐而不及齊之所  
以伐燕當何如亦其理也若後來之事聖賢豈能灼  
於未然哉

何以異於是

斐一條

言子噲子之以國私相授受何以異於以爵祿而

私相授受者所以著其罪也著其罪所以明燕之可伐也

勸齊伐燕有諸曰未也

芟一條減十五字更定次序

或者之問蓋不以伐燕為然也未也只是言未曾

或疑此問者發於燕人畔之後蓋有追咎之意曰未然也首之以齊人伐燕即繼之曰或問曰云云只是知其未然也

今有殺人者或問之曰人可殺與



兩人字不同下一人字是殺人之人也

今以燕伐燕何為勸之哉

君子居是邦不非其大夫而孟子明說以燕伐燕且尚在齊蓋亦不得已也

燕人畔王曰吾甚慙於孟子

前諸侯將謀救燕則曰宣王曰此但言王曰疑是湣王也蓋著書時湣王未卒無謚可稱也

知而使之云云是不智也

陳賈意只要坐不智與周公故下文又云周公知其將畔而使之與曰不知也賈斷曉不是知其將畔而使之亦斷曉得孟子不以為是知其將畔而使之然則聖人且有過與不智是過若不仁則不止於過也過字要如此認

周公弟也管叔兄也

愛兄之心勝容有不料其有他而使之者

周公之過不亦宜乎

斐二條

周公之過天理人情所不能免之過也故曰不亦宜乎明其不幸也 盖必求無過必須逆探其兄之惡而棄之矣然則孰與有過之為愈乎盖有過之過小無過之過大也此等過真是聖人之不幸而已何可求免也

且古之君子過則改之

楚二條臧六十八字未條湊合

今之君子不必說指賈亦不必說指王只是泛論而寓責賈之意於不言之表聖賢是其次第為見賈特

地撰出此議論於他面前講必有箇來頭心是恁窺度他故綴以此語其實未知其為王解燕人畔之慙也其過也與及其更也相對皆就君子身上說民皆見之民皆仰之亦全就君子身上說

且古之君子過則改云云此是一節意古之君子其過也云云

此又是一節意此與下文三句相對見得不是為之辭所謂磊磊落落如青天白日者若為之辭則前

無民皆見之後無民皆仰之

豈徒順之又從為之辭

藏十六字

重在為之辭一句豈徒順之承上文而帶過下意耳  
又從為之辭為字是如字不可讀作去聲林氏註  
謂陳賈鄙夫方且為之曲為辨說此為字是去聲亦  
是圈外註 賈賈不能勉君遷善改過而教之以遂  
非文過註此意也要微微說當時賈不曾明說出云  
云孟子亦安得顯然責之云云故君子字不可認作

齊王又不可認作陳賈

孟子致為臣而歸

芟一條

致送至也見正韻致為臣送還其政於君也 孟子  
始在齊為賓師後雖為卿而不受祿齊王蓋猶以賓  
師待之 其致為臣還卿位也

得侍同朝甚喜

芟一條末條出下題

本是孟子千里而見王今曰得侍是言已得侍賢者  
也本是齊王自喜今曰同朝甚喜見得同朝皆喜則

王之喜又當何如亦善為辭也 此時齊王不曾要  
留孟子他日王謂時子時王蓋以孟子尚在未去故  
云云與尤為不知孟子

他日王謂時子曰云

云為我言之 斐二條移一條入上題

他日王謂時子曰我欲當國之中授孟子以室廬使  
得便於居處且其弟子自遠方來者數多自給為難  
吾將養其弟子以萬鍾使吾國中諸大夫及國人皆  
有所矜式吾此意子盍為我言於孟子庶幾其少留

乎

時子因陳子而以告孟子

芟三條藏八字

因依托也此方是托陳子以告孟子下句方是陳子以時子之言告孟子

孟子曰然夫時子惡知其不可也

藏十九字

此然字只因陳子所述時子之言而曰是如此邪然時子惡知我之不可以復留邪且王之欲養弟子以萬鍾者豈以予為欲富乎



如使予欲富辭十萬而受萬

又前日不受卿祿亦是以當時諸侯只挾其勢祿在手以為足以輕重天下士也如是則待賢之心薄了安望其上下交而德業成也故孟子早見而堅執不受其祿使齊王知其志不在溫飽耳故曰如使予欲富云云乎且吾既以道不行而去乃復以萬鍾之饋而留則是不得於彼而又欲得於此其趣不足言矣季孫曰云云

使已為政不用芟一條戒二十五字

二使字不同上使字是如使之使下使字是子叔疑使之也已指子叔疑已矣之已止也

人亦孰不欲富貴云云私龍斷焉芟二條

獨字與上句孰不字相反應獨於富貴之中有私龍斷焉直指子叔疑也 龍斷猶言絕頂故曰岡壘之斷而高也 問子叔疑是既不得於此而又求得於彼龍斷者是欲得於此而兼得於彼如何以為同曰

不得此又欲得彼者原其本心固是欲得此而又取彼也

而罔市利

芟二條減一百三十六字二條湊合為一

罔謂罔羅取之也註有一罔括盡之意故使人賤之也然隆古之時尚以此為賤而今世則皆以此為當然而不復以為怪惟恐貨力之不充而已是又可以論世道矣此章當以程子之說來斷他程子曰齊王所以處孟子云云註蓋孟子之去齊者以道也

而齊王之所以留者利也此齊王之所以終為不能  
留孟子所以終不留於齊而其道之所以終不行齊  
之所以終於不振也

孟子去齊宿於晝

孟子去齊宿於晝因是遲於出晝故致有欲為王留  
行其致為臣而歸不以明日而遂行故致王有萬鍾  
之留甚矣聖賢之心多有不得白於人者要之久而  
後明也然亦可見在常人不可不知避嫌矣

泄柳申詳無人乎繆公之側

芟三條

朱子曰非謂二子倚君側之人也語其勢則然耳  
子為長者慮而不及子思

上文泄柳申詳無人乎繆公之側只見其類同故引  
之其實孟子非止泄柳申詳之匹亦非只望齊王待  
以泄柳申詳之禮者故言此只言子為長者慮而不  
及子思

子絕長者乎

芟三條減二字改誤

全在為長者慮不及子思一句上正為繆公是自使人於子思之側今齊王不使子來而子自欲為王留我則不以子思待我矣非薄我乎亦宜乎我之絕子也 集註二先字亦是為孟子周旋語意處不應隱几而卧難說不是絕他但是他先不是了

孟子去齊尹士語人曰 斐三條

尹士譏孟子有三段一曰是不明也二曰是干澤也三乃曰是何濡滯也今孟子只辨是何濡滯也一句

上二句都不管者何邪曰千里而見王是予所欲也  
既如此說便見不敢逆以為不足為湯武且非干澤  
之意尤明矣

士則茲不悅

斐一條

言平日敬慕孟子只因此是有不足於孟子者千  
里而見王豈能輕於去哉不過故去盖有不宜不去  
者矣乃三宿而後出晝是何濡滯也言其猶有戀慕  
不決之意也千里而見王直欲行吾願也不遇故

去則違吾願矣豈能以遽去哉此孟子之意也 或  
疑孟子千里而見王是自請見齊王不如見梁惠王  
為應聘而往見也曰非也不見諸侯之義決是孟子  
終身所守而不變者前日應梁惠王之聘而往亦說  
得千里而見王也 非本欲如此也 註此本字正是  
本心之本

王庶幾改之王如改諸則必反乎

言我之於王尚望其能改之也然王如果能改之則



必追我而反之夫惟其出畫而王不予追也予然後浩然云云庶幾望之之辭予雖然豈舍王哉以下至予日望之又是出畫之後之心如此至此尚猶未能舍王也愈見其愛君澤民惓惓之餘意

王由足用為善

芟一條戒三十一字第二條出下題

所謂為善是後日事王如用予則豈徒齊民安天下之民舉安此是足用為善嗚呼聖賢是甚次第王如用予則豈徒齊民安天下之民舉安以此言之孟

子今日一身之去就其關係何如也安能果於去齊哉當時列國之君舍齊宣無一可望者矣甚矣孟子之不能果於去齊也

王庶幾改之予日望之

斐十四條藏十九字更定次序

予日望之仍是王如改諸則必反予之意要見得

王庶幾改之王如改諸則必反予此謂三宿時心

事也夫出晝而王不予追也其時心方決去耳雖然猶有不舍王之心云云只是兩節尹士最有功於

孟子當時若無尹士之譏評無以發孟子之本心七篇中所載諸人與孟子相辨論者皆無如尹士之優柔而深切主於義理而不主於勢利其人品為獨高也且聞孟子之言而遂幡然責已曰士誠小人也嗚呼尹士其誠君子哉行道濟時汲汲之本心千里而見王是予所欲也愛君澤民惓惓之餘意不遇故去豈予所欲哉三宿而後出晝雖然豈舍王哉王庶幾改之予日望之輔氏以王如用予豈徒齊民安天

下之民舉安亦為行道濟時汲汲之本心不知此正是愛君澤民惓惓之餘意也 李氏曰於此見君子憂則違之之情註只是不得已之意要看箇情字

孟子去齊充虞路問曰夫子若有不豫色然

由周而來七百有餘歲矣以其數則過矣是一段事以其時考之則可矣又是一段意其歸則同

以其數則過矣

變一條補一題

言王者不興則不得一有所為以立吾名世事業能

無不豫乎 夫天未欲平治天下也云云豫哉補此  
段是亦有負其所有之意不知朱子如何以為樂天  
言其當不終窮也有藏器待時之意在孟子分上  
亦樂天之事樂天之誠此天字以理言與本文夫天  
未欲平治天下也之天字不同 愚謂若云吾道雖  
不得行於當時然猶足以傳之來世如此說尤見樂  
天耳今云如欲平治天下云云厥後天終不曾用以  
平治天下然則孟子終不免於不豫乎 憂世之志

憂以天下也若憂及一己之利害則不能與樂天之誠並行而不悖矣

孟子去齊居休

芟三條臧四十六字

前面則說三宿出晝猶以為速且曰王由足用為善王庶幾改之予日望之今於丑之間則曰始見王則有去志又曰久於齊非我志何與曰不汶汶於留而亦不悖悖而去此義自並行而不相悖故君子雖不潔身以亂倫亦未嘗徇利而忘義也 新安陳氏曰

不受齊祿此孟子最高處其超然不屈進退餘裕本  
全在此一受其祿則為祿所縻是為為祿而仕耳十  
萬之祿脫屣而去齊王猶以萬鍾縻之豈知孟子者  
吾意戰國之世高節如許惟孟子一人而已庶幾焉  
者其伸連乎 國既被兵難以請去非避嫌也直是  
勢有所不得去者且見王天資亦可取故留而為卿  
以觀其久後感悟如何但不欲變其去志故不受祿  
耳

四書蒙引卷十